

PEPPE SOZU - ANTONI PIREDDA

Festa de Santu Juanne

FONNE, SU 24 DE LÀMPADAS DE SU 1980



DOMUS DE JANAS

ESÒRDIU

1. Sozu (1'23'')

S'annu passadu in su mese 'e Austu
apo cantadu a Maria 'e su Monte,
una cheja innaltzada in logu giustu
chi at fatu un'ispléndidu orizzonte.
Oe su logu de sa gara est custu
cun Maria 'e sos Màrtires a fronte
chi est sempre sa própia Signora
e caldu unu saludu nde 'ato ancora.

2. Piredda (1'18'')

Fonni, a iscultare ses dipolta
cun su poesianu godimentu.
S'antiga data 'e sa cort''e cunventu
annos medas abbeltu mi as sa polta.
Ocannu puru s'onore apo tentu
de che torrare un'ateruna 'olta.
E bos nd'ato unu saludu che amigos
pius afetuosu 'e sos antigos.

3. Sozu (1'14'')

A da chi t'apo tocadu sa manu
nad'apo arrivederci e no adiu
faghindemi su contu de esser biu
poi discretamente ancora sanu.
E gai t'apo lassadu in s'istiu
e ti saludo ocannu a fine 'e 'eranu:
torro po respirare ària pura
a custos logos de villeggiatura.

4. Piredda (1'00'')

Fonni, sos pagos versos chi ti do
est veramente ca ti lu meritas.
Lontanu vivo e lontanu nde abbitas,
ischides totu in Tathari che so,
ma però dogni 'olta chi m'invitas
non so capatze a ti narrer chi no.
No so in logu meu e non cumando
ma si no mi che mandas no mi ch'ando.

5. Sozu (1'10'')

Si un'ora e mesu as fatu 'e caminu
non t'at aer, Antoni, fatu male.
Dae su nordo 'e sa Sardigna in sinu
est finaistradale:
como semus in s'era ispatziale,
tenimos finas sa luna vicinu.
Bastet de non mancare su coraggiu
oe a nemos ispantat su viaggiu.

6. Piredda (55'')

Deves ischire chi sa domo mia
chi est lontanu da custu paese:
che dia cherrer benner dogni mese
pro lis cantare calchi poesia
ma cando b'andas cun sa simpatia
paret chi jutas sas alas in pèse.
E no importat nudda su caminu:
su ch'est lontanu mi paret vicinu.

7. Sozu (!'10'')

Ses tantos annos in giru a traessu
in sos palcos cantende in poesia:
as fatu carriera cun suzessu
cun megus e su restu in cumpagnia.
Ma no dêt esser totu simpatia,
dêt esser unu pagu de interessu:
giras che totu sa terra isolana
po cussos pagos soddos chi nos dana.

8. Piredda (55'')

Da chi sos soddos nd'as bogadu a pizu
totucantos tzarramos a s'apolta.
S'isperàntzia cando no est molta
ti naschet sempre calchi contivizu
ca chie ch''enit po sa prima 'olta
tenet de che torrare su disizu.
E no podet s'asséntzia tratènnere
ca disizat de che torrare a bènnere.

9. Sozu (1'12'')

Deo tenzo sa vaga impressione,
manc'una 'idda in sa Sardigna est fea.
Nois giramos sa Sardigna intrea
ca nos l'imponet sa professione.
Ma unu no nde setzas in cadrea
unu ponindechelu in su cuzone:
chelfende tzertas biddas apretzare
a mie paret sun totu che pare.

10. Piredda (50'')

Pares chilchende unu puntu 'e apoggiu,
cheres assegurare calchi atretzu
ma cando est antzianu Peppe Soggiu
finas Piredda si ch'est fatu 'etzu:
bi sun sas biddas chi nos dan eloggiu,
bi sun sas biddas chi nos dan dispretzu.
Sas simpatias sunu fatas gai:
tot'oguales no lu sunu mai.

11. Sozu (1'08'')

A mie no cuadrat s'arrejonu
de ambulantes in sa vida randaggia.
Sas biddas sun de su matessi donu
da Gennargentu a s'ultima ispiaggia
po gai in custas biddas de Barbaggia
ch'est sempre su tenore pius bonu.
Sun donos ch'an immensos in podere,
cussu nos faghet sempre piaghene.

12. Piredda (53'')

Peppe Sozu, cumprende s'arrejonu,
pisca sos versos cun sa punta 'e s'agu.
Nàrami in custas garas de divagu
giuditziuos nde faghen a s'indonu:
ue ti naran ses poeta 'onu
e inue ti naran giuas pagu
ca sos giuditziuos de ogni comunu
caru Peppe, oguales no lu sunu.

13. Sozu (1'03'')

Ma una cosa narrer ti cheria
est su nostru un'ispétzia 'e divagu
chi a boltas nos ponet pena e tragu
a ponner una 'idda in armonia.
Ma ue nde cumprenden pius pagu
leamos pius paga bataria
e gai da chi sa gara est finida
mancu sa zente nos legget sa vida.

14. Piredda (51'')

No est chi siat sa zente malvaggia,
solu la pensan a su diferente.
Inue t'ana in coro e in mente
nelzende ch'as una mente saggia
ma si ses preferidu in sa Barbaggia
e no ti cheren in s'Igresiente,
Peppe Sozu, chi as isperiéntzia,
nara: puite custa diferéntzia?

15. Sozu (1'07'')

Non nde fato una crítica maligna
in sa distintzione de tantos sites
po cherrer poi acampare diritos
cun custu donu chi tenzo in cunsigna
ca a mie mi arrivan sos invitos
dae totu sas biddas de Sardigna.
Si totucantos mi dan preferéntzia
no las trato cun vera diferéntzia.

16. Piredda (53”)

A su chi ses nelzende pone cura
arrejona cun pius gentilesa.
Ja l'ischis bene, sa zente fonnesa
t'at ammiradu sempre sa figura:
ti ch'at batidu dae gioventura
e t'at mantesu finas a sa 'etzesa
e duncas a s'edade 'e la finire
custa zente si devet preferire.

17. Sozu (1'09“)

Ja poden esser versos iscadentes
e chilcan de los ponner in risaltu.
Gióvanos non nde pigat a in altu,
podet esser non sun totu cuscientes
prite si nos abbaidan a dentes
como semus fiados de iscaltu.
Però nos lassan un'àtera annada
ca ite 'e seberare no bi nd'ada.

18. Piredda (43”)

Abbizatinde ite as nadu como
altzèndeche sa 'oghe tropu in altu.
Però de cussas cosas no fentomo,
no lu chelzo tocare cussu taltu
ca si t'aian connotu 'e iscaltu
mi' chi lassadu t'aian in domo.
E si ti nd'an torradu a custa zona
t'an batidu comente robba 'ona.

19. Sozu (1'08'')

A mie m'est poninde in pensamentu
ca amos bidu annadas ingratas.
Non s''iden boghes noas de talentu
po las aer sas garas mezus fatas:
po cussu sun boghende a sas piatas
solu su chi lis passat su cunventu.
Finas su 'etzu a da chi pagu rendet
poite cosa noa no s'intendet.

20. Piredda (54'')

Si ses arrejonende 'e s'Elicona
de fronte a una prùbbica piata
coment'est la pensa e l'arrejona
chi non est sempre s'època cumpata:
podet sutzèdere un'annada ingrata
ma sempre in-d-una tanca 'e terra 'ona.
Si as in cuss'annada fatu dannu
podes recuperare a s'àter'annu.

21. Sozu (1'07'')

Versos no nd''essit cun fatzilidade
chi no bi restat ne briu e ne bória.
Non mi paret chi siat una glória
unu a cantare in avantzada edade
ca non est pius frisca sa memória
ma sa Sardigna nde at netzessidade
po lu muntenner su sardu folclore
cun concas puru 'e biancu colore.

22. Piredda (50'')

Mancari como tenzas pagu briu
 ca s'edade a dasegus mi che at poltu
 deo a sospalcos no lis do s'adiu
 e ne fato a nisciunu murre toltu:
 deo lis fato su contu 'e su 'iu,
 tue lis faghes su contu 'e su moltu.
 Aferro s'isperantzia de abberu,
 no chelzo morrer da su disisperu.

23. Sozu (1'05'')

Cust'est, Antoni, un'àtera rejone
 de sa 'etzesa 'e gl'ória t'indora.
 Però po nois diat esser ora
 d'esser in domo nostra in pensione.
 Ma sempre minimende est su masone
 e bonas noas non nd''essin a fora
 e giramos ancora inn dogni tretu
 ma forsi nos sun lènde po s'apretu.

24. Piredda

Tzeltu no semus in sa primavera,
 no torramos de nou a fiorire
 ma mancari 'etzigheddos cunsidera
 mi' chi nos cheren a los divertire

.....

TEMA I: **CORAGGIU - PAURA**

1. Sozu (1'18")

De nou nos ponimos in viaggiu
 po chi no restet nisciunu in fastizu
 bessinde cun sos versos a passizu
 a totus po nde poder dare omaggiu.
 Como an su primu tema 'ogadu a pizu:
 a mie m'est tocadu su coraggiu.
 A cosas gai non fia suggetu,
 como so coraggiosu po s'apretu.

2. Piredda (1'06")

Chie iscultat e chie passizat
 ca est gai sa nostra vida umana:
 chie regalat e chie disizat,
 no diat esser, no, cosa metzana.
 Unu tema a cantare dadu m'ana
 chi aggiornai a mie si assimizat.
 E lu fato presente addirittura
 prite devo cantare sa paura.

3. Sozu (1'14")

Oramai sa zente nd'est convinta
 ch'in dogni campu unu tema bi apricat
 in sa rejone ca lu significat
 s'illargat o po dare calchi astrinta.
 Ma penso su coraggiu est un'ispinta
 chi sa fortza 'e ognunu multiplicat.
 At a esser un'òmine su própiu
 ma cun coraggiu rendet nessi a dópiu.

4. Piredda (59'')

Ja l'apo s'importàntzia cumpresa
e-i sa parte l'as bene distinta
però nde tenzo s'idea cunvinta,
solu non debes esser in s'impresa.
Si su coraggiu tou est un'ispinta,
mi', sa paura est una difesa.
E de fronte a su coraggiu si b'atuas
mi parat totu sas ispintas tuas.

5. Sozu (1'07'')

Inue cheres podes dare ilfogu
si t'an gai unu tema preparadu?
Ma si at solu coraggiu est in gradu.
de si distingher sempre in dogni logu:
no at paura a l'òmpere a su fogu
ne a passare in su riu aundadu.
S'at s'inimigu unu pramu 'e iscaglia
no timet mancu a b'intrare in bataglia.

6. Piredda (52'')

Su paragone chi as batidu 'e fronte
da parte mia benit atzetadu.
Ma cando at malumore in s'orizzonte
ch'est unu tempus malu iscadenu
a da chi unu riu est aundadu
fatu su giru e che passo in su monte.
Tue ch'as su coraggiu totu in briu
annegare che podes in su riu.

7. Sozu (1'01'')

E cando mai no tenes pedinu
chi s'eroismu meu no assegundas?
In abbas bascias e abbas profundas
deo mi devo abberrer su caminu:
si b'ada unu morinde in sas undas
si ch'imbolat a modde su bagninu.
Est su meschinu 'e vida a s'ultimora
ma cun coraggiu nde lu 'ogat fora.

8. Piredda (51'')

Sa parte tua e-i sa palte mia
deven toccare dogni chirriolu.
In palte apo cussa pauria,
finas cussa mi servit de consolu
e da poi si timo non so solu
ja che tenz'una manna cumpagnia.
Mirade s'universu totu in tundu
nade: chie non timet in su mundu?

9. Sozu (49'')

Ma da chi times, Antoni Piredda,
non podes esser in vida un'eroe.
Ma cun coraggiu ti distinghes oe
si ses tue in sa pena pius niedda:
su cumandante Juane Camedda
ch'imbucac cun su mare a fortza noe.
Lassende sa famiglia sua in penas
est pro salvare sas vidas anzenas.

10. Piredda (52'')

Su paragone est bellu e giocundu
ma ti rispondo goi azigu-azigu.
O est dovere o est un'obbrigu,
si ch''etat in su mare furibbundu:
e si pro salvare un'àteru amigu
issu ch'esserat faladu a su fundu?
A ite contan sos prodigios suos
cando sos mortos fin bistados duos?

11. Sozu (56'')

A ue arrivat su tou operare,
o Antoni, ischire lu cheria.
In pena est parte 'e s'umana zenia,
bi cheret calicunu a los salvare:
da ch''essit unu s.o.s dae su mare
est ca b'at calchi nave in avaria.
E tue si ses ómine 'e coraggiu
po los salvare póneti in viaggiu.

12. Piredda (51'')

Mi naras a mi pónnere in viaggiu
e deo puru ja apo a tucare.
Ma da chi tue tenes su coraggiu,
o Peppe, ti cheria domandare:
prite sas naves chi sun in su mare
jughen sas barcas de su salvataggiu?
Po si salvare las jughen a polta:
tórrami, Peppe Sozu, una ripolta.

13. Sozu (56'')

Mi paret cussa precauzione
chi bi an una legge a posta fatu.
Si si bolluzat su mare est ingratu,
in perìgulu est dogni persone
ma si ses de coraggiu a campione
sìghila cussa nave a tratu-tratu.
Da chi ch'arrivas a-i cussas alas
salvas a issos, tue t'immortalas.

14. Piredda (49'')

Non m'asa nadu puite s'impitat
sos salvataggios ch''idesi pro salmu
ca est medida s'abba palmu a palmu
proite sa paura netzessitat
prit'a sas boltas su mare este calmu
e a sas boltas su mare si agitat.
E jughen barcas a manca e a dresta
puite sun timende sa tempesta.

15. Sozu (54'')

Nois podimos fagher una resta
però, Antoni, sos ojos abberi.
Siat in calesiat mestieri
est sa paura una cosa funesta
e su coraggiu 'e unu marineri
s''idet cando su mare est in tempesta.
Deo soltantu mi distingo incue
però no ti distinghes mai tue.

16. Piredda (

Mancari bene non m'apas ripoltu
 ja m'asa fatu un'otava onesta.
 Ma si su mare la leada a toltu,
 o Peppe Sozu, guastat sa festa
 e a da chi su mare est in tempesta
 prite sas naves prenden in su poltu?

.....

17. Sozu (50")

Si prenden in su poltu una barcheta
 no at de fortza perunu ingranaggiu.
 Sa chi si devet ponner in viaggiu
 a ora sua che partit dereta:
 tue cun issa raggiunghes sa meta
 ma ti distinghes dae su coraggiu.
 Tue coraggiu ca non nd'as assai
 si times sempre no bi paltis mai.

18. Piredda (46")

A su coraggiu ses cantende osanna
 faténdeti 'e s'eroe su zigante.
 Deo de sa paura apo sa janna
 ma fina cussa mi paret bastante
 ca cando b'est sa nave pius manna
 mi chi s'àncora b'est pius pesante.
 E proite custu pesu si procurat?
 Prite su pesu sa nave assegurat.

19. Sozu (54'')

Bi nd'at fina chi tenet pagu pesu
e sas undas continu in avolotu.
Ma s'at coraggiu ja partit etotu,
che podet arrivare tantu atesu:
dae Palos Colombo genovesu
s'aventurat in-d-unu mare ignotu
e afrontende de sas undas sa gherra
at iscobeltu un'ateruna terra.

20. Piredda (45'')

Peppe chi ses un'arregonadore
rispóndemi che ómine assennadu.
E no est a calicunu capitadu
unu disturbu o unu malore?
A su mossu 'e su cane arrajoladu
narat puite jamas su dutore:
a lu jamare bi tucas a bolu
timende a ti pigare su rajolu.

21. Sozu (53'')

Ja l'isco chi unu mossu faghet male,
mi paret su momentu pius ingrato
e-i sa cura 'e seguru ti an fatu
per'a tie non rendet immortale
ca unu tipu non paris addatu
'olare in navicella ispatziale.
Solu sos coraggiosos an fortuna
de ch'esser arrividos a sa luna.

22. Piredda (48'')

A sa luna sos ómines ch'as jutu
e-i sa luna ch'est tantu lontanu.
Però s'ómene est su pius astutu
e visitat sos campos de Uranu
ma su chi 'olat cun s'aeroplanu
puite jughet su paracadutu?
Tue li naras eroe maduru
e puru sun timende cussos puru.

23. Sozu (58'')

Ma su coraggiu a ponner in risaltu
no ti ponzat, Antoni, in mala muta.
Si su paracaduta l'at ispaltu
tzeltu chi fit timinde de una ruta
ma bi nd'at a milli metros dae altu
chi no abberit su paracaduta.
E lu abberit, sa lógica aferra,
soltantu a chentu metros dae terra.

24. Piredda (44'')

Ja ses arrejonende cun giudisciu,
tocas inoghe e tocas iguddae.
Sos paragones chi pones a misciu
Mi' non m'afian peruna piaie:
non bi at janna chi no b'est su frisciu,
no bi at frisciu chi no b'est sa jae.
Tue càscaras a manca e a drelta
prite no drommis mai a janna abbelta?

25. Sozu (53'')

Deo agato in totue su riposu
in domo manna e in domo picoca
ma da chi est su tempus dubbiosu
cun tronos in s'aera tzoca-tzoca
non timo nudda si so coraggiosu
mi dromo finas in sa punta 'e sa roca.
Tue times a lughe e a s'iscuru
cun sa janna frisciada e times puru.

26. Piredda (47'')

Deo timo che a dogni abbitante
ca nisciunu at sa vida asseguradu.
Osselva finas calch'iscientiadu
at tentu un'intelletu penetrante:
timende sa saeta fulminante
ana su parafùlmine inventadu.
Timende 'e sa paura a sa manera
t'at fatu sa saeta presonera.

27. Sozu (53'')

Però su coraggiosu ammentatilu
non timet cando lampos bi at in vista
ne li parit un'ora fea e trista
po chilcare rifuggiu e ne asilu:
as osservadu un'ecuilibbrista
passat e ballat subra de unu filu.
Ma tue gai in s'ària suspesu
timo chi non b'apunes mancu presu.

28. Piredda (47'')

Ja ti rispondo in sa matessi pasta
senz'ispìritu 'e contradizione.
Cun s'acrobata non bi ponzo vasta
ja chi est de coraggiu pultzione
ma osserva finamenta su ginnasta
tenet sa rete de protetzione.
E-i sa rete la faghen recùere
ca finas cussos timen a nde rùere.

29. Sozu (52'')

Ma su coraggiu ti b'aggiunghet brios
e-d-est s'acrobatzia una cucagna
ca 'olan e s'abbratzan sa cumpagna,
fin'a sa rete dadu an sos adios:
sos chi a pês si prenden sos iscios
falan a bolu dae sa montagna
in su nie tracendesi una cora
ma però caminende a chentu a s'ora.

30. Piredda (49'')

Faeddas bene che poeta saldu
però pensas che ómine mannitu.
Ogni pastore si faghet s'abbitu
e b'at po sa paura rigualdu:
e cantos partin da su logu fritu
e si che calan a su logu caldu?
E apo s'onore 'e ti faghet ischire
chi finas cussu si devet timire.

31. Sozu (50'')

Ma su pastore est una vida sana
tot''e coraggiu un'arduva impresa
prite si no est gai, a l'as cumpresa,
no tenet late, ne peta, ne lana.
In su Piave, Carso e Col di Lana
an bidu sa Brigata Tatharesa
e sos italianos sun cunvintos
ch'est su coraggiu chi los at distintos.

32. Piredda (48'')

Lassa de su pastore late e pane,
da igue nde tiro unu fiore:
finas su pastoriu est in timore,
in su pasciale che prenden su cane.
Su pastore est timende su margiane,
su margiane est timende su pastore.
Ognunu tenet sos conflitos suos
e mi paren timende totos duos.

33. Sozu (53'')

Si sighis sa paura in cuss'istile
non diventas pastore a campione.
Ma si b'at nie in caminu ti pone
a palt''e sero o puru a manzanile:
si ti che sun furende su masone
cun coraggiu ti armas de fusile
chi as a esser un'eroe nou
da chi difendes su dovere tou.

34. Piredda (39'')

Cand'arrejonas cun calma e gentile
fina su paragone est pius galanu.
Si s'ama ti che leat unu vile
li podes narrer birbante e tiranu
e invece 'e leare su fusile
puite no l'afrontas manu-manu?
Si su fusile l'aferras inie
ca su ladru faghet timer a tie.

35. Sozu (53'')

Non m'as a narrer e ite congrues
sentza fusile ne arma bianca.
Dae me non si l'at a fagher franca
ma tue 'e sa paura in terra rues
ca si bies sos ladros in sa tanca
invece 'e ti difender ti che fues.
Si che lean sa robba, so seguru,
e si ch'an a leare a tie puru.

36. Piredda (46'')

Tue chi 'e su coraggiu ses s'amigu
nara puite sa paura impones:
non m'as a narrer cantos pinnatzones
ponen in sos assentos de su trigu,
in binzas e in àlvures de figu
po che fagher fuire sos puzones
ca si no timen in sa 'inza tua
si màndigan sa figu e-i sa ua.

37. Sozu (51'')

A igue bi semus arrividos
poi no sun che pare sas rejonas
ca sun sos coraggiosos campiones
cussos a mie dên esser unidos
ca tue times finas sos buatonas
deo non timo mancu sos bandidos
si benzeren a domo a sa preséntzia:
eco inue est sa nostra diferéntzia.

38. Piredda (50'')

Si tue ses unu pastore mannu
ti armas de fusile e de pistola:
de sa paura si ponet s'iscola
ca s'ama la costois totu s'annu
poi timende de ti fagher dannu
pruite no la lassas a sa sola?
Ma ti b'istas inie a la tentare
ca ses timende a ti che la furare.

39. Sozu (56'')

Deo s'apo coraggiu s'ama mia
continu a la difender mi nd'onoro.
Un'istória iscrita a cifras d'oro
tenet de santos s'immensa zenia:
non timet a Pascàsiu Lughia
ne Barbara at timidu a Dioscoro
su coraggiu dognunu at fatu forte
non timet ne su boje ne-i sa morte.

40. Piredda (51'')

De sos santos mi cantas un'istória
e m'as dadu unu paragone bellu.
A Lughia, Pascàsiu e Vitória
paret chi m'apas jamadu a s'apellu:
afrontan de sa morte su masellu
ca fin timende a pèldere sa glória
prite totu sos santos a trofeu
an obbididu a su timore meu.

41. Sozu (53'')

Lassa ch'àtera cosa eo ti nómine
inue tenzo sa parte segura.
A da chi times, fémina che ómine
de chelu non bi pigas a s'altura.
Pedru si fit fuinde po paura,
Cristos l'at nadu: quo vadis, Dómine?
Ca cun coraggiu ubbidit a Gesusu
che l'an postu in sa rughe a pês in susu.

42. Piredda (49'')

Santu Pedru at piantu e no at risu
ma li devimos dare lode e bantu
ca a su rifaciu est 'istadu detzisu
e arreppitit galu totucantu.
A l'ischis Pedru puite at piantu?
Prite peldende fit su paradisu
e at pensadu de si cunveltire:
su pecadu lu faghet a timire.

43. Sozu (52'')

Ma sa rejone dae fundamentu
léala e si distinghet de piusu.
Pedru momentu 'e debbilesa at tentu
a da chi in coro at sa paura inclusu:
timinde e lu 'ochire che a Gesusu
fatu at fina unu falsu juramentu.
Ma ca at coraggiu diventat sovranu
e at de chelu sas jaes in manu.

44. Piredda (42'')

Su paragone chi as poltu in usu
e l'at intesu su pópulu unidu:
a Predu capitadu at un'abbusu
ma da ch'at su pecadu cummetidu
mi' chi s'est finas Pedru curreggidu
timende sos rinfacios de Gesusu
prite Deus si devet obbedire
e a su matessi tempus a timire.

45. Sozu (54'')

Si non tenes coraggiu tando adiu
non podes a su chelu altzare a bolu.
Triunfas dae su coraggiu solu
ca a ti salvare est chi ti dat s'aviu:
a Astiage timidu no at Poltolu
da chi su colzu 'ogadu nde li at biu
e coraggiu at Larentu in cussu logu
a da chi l'an arrustidu in su fogu.

46. Piredda (41'')

A pensas cun sos santos a finire
ca bastare podiat una ebbia?
Ma una mama podides ischire
chi faghet a su fizu cumpagnia
e si su fizu lu devet drommire
cantat in su brasciolu s'anninnia
e da chi l'at drommidu in su brasciolu
nara poite no lu lassat solu.

47. Sozu (56'')

Si cun sos santos non miro sa glória
lasso finas sa mama tranquilla.
Tue as a consultare una Sibbilla
però non podes aer mai vitória
ma unu monumentu po Balilla
nara poite li an fatu in Portória?
No at timidu a bintrare in atacu
e s'iscagliat cun dogni austriacu.

48. Piredda (45'')

M'as a narrer Balilla ite t'at resu,
est unu mingherlinu ideadore.
Però in-d-una mama no as cumpresu
inue b'est s'istima e-i s'amore
però no b'at unu fizu minore,
b'at unu grande fogu atzesu
e non lu lassat solu in cussu logu
ca timet de che rùere in su fogu.

49. Sozu (50'')

Su coraggiu a sa mama est necessàriu,
si lu negas t'isbaglias in pienu.
Dae tempus lontanu sena frenu
unu direto istraordinàriu:
bi fit unu pitzinnu in su binàriu
sa mama 'etada si est suta su trenu.
Cun sos bratzos l'at a su sinu inclusu
e-i su trenu 'eretu passat susu.

50. Piredda (46'')

Su paragone est de méritu e fama
e so capatze 'e nde dare su prou.
Ma no est totu su méritu tou,
de ti salvare dias tenner brama:
suta su trenu si ch'etat sa mama
prite salvende fit su fizu sou.
Si ch'est morta cun pena e cun fastizu
ca fit timende de morrer su fizu.

51. Sozu (52'')

Cun-d-un'otava sémplice e astuta
cherias dever bolare in altura
però 'idinde cussa criadura
guasi molta in terra che fit ruta
a si ch'etare de su trenu in suta
be-i cheret coraggiu e non paura.
Po cussu at cun coraggiu jumpadu
e su fizu innotzente l'at salvadu.

52. Piredda (39'')

Su paragone chi as bogadu a pizu
ti lu repito un'ateruna 'olta:
una mama s'est posta in contivizu,
pensa chi fatu no bi l'at a polta.
Tue mi naras salvat unu fizu
e mentres chi sa mama si ch'est molta:
unu nd'at salvu, una bi nd'at restadu
e non b'at példidu e ne balanzadu.

53. Sozu (55'')

Si lu teniat sa mama in disizu
ti l'ispiego a momentu oportunu.
In realtade sas cosas lu sunu
momentos de dolore e de fastizu
ma s'at sa mama abbratzadu su fizu,
fit cuddu 'e su perigulu a digiunu.
Però in veridade a sos concluos
abbratzados si salvan totas duos.

54. Piredda (47'')

Prima fit unu chi at tentu sa solte
de si salvare po sa vida bella.
Como lasso sa mama o sa cunsolte,
abbandono s'umana parantella:
inue b'at una casciafolte
prite bi ponen una sentinella?
S'est chi non timen sos chi be-i passan
puite a sola non la lassan?

55. Sozu (55'')

Ispieghende 'ogni cosa cun cura
inue cheres, Antoni, che cola.
Ja l'ischis chi sos ladros an s'iscola
finas a abberrer ogni serradura
ma po sa sentinella chi at paura
menzus sa cascia l'assala a sa sola.
Su coraggiu a la tentare est su chi rendet,
tando sa casciaforte la difendet.

56. Piredda (48'')

Sa sentinella est guàldia vera
e tutelare devet in totue.
Si est armada non be-i andas tue
ca de timire ti 'enit a manera
e si la tentan sa bulveriera
sa sentinella bi ponen igue.
E si la tentan b'at unu motivu:
ca timen de brujare s'esplosivu.

57. Sozu (51'')

Fina a cant'est su logu trancuillu
nemmancu sentinella si no b'ada
la lassas una cascia sizillada
e nisciunu ti segat su sizillu.
Ma si b'est su custode cun s'istillu
cun su mitra, fusile o cun s'ispada
po chi difendat su logu famosu
ponen unu soldadu coraggiosu.

58. Piredda (40'')

Cand'arregonas, arrejona umile
ca dogni cosa cheret moderada.
Nara puite l'as dadu s'ispada,
l'as finas innestada a su fusile,
prite sa sentinella s'est armada?
Ca ses timende 'e b'andare su vile.
E pensa de su tema cale omaggiu
ca sa paura ti ponet coraggiu.

59. Sozu (51'')

Cun coraggiu, ammenta, sos umanos
poden in dogni campu triunfare:
suta sa miniera den calare,
si faghen tando sos gallos in manos
e che pigan in altu a fraigare
sos gratacelos de chentu pianos.
Tue non de bi ponner su contone,
non ti b'acheras mancu a su balcone.

60. Piredda (38'')

Com'as fatu un'otava curiosa
però subra b'agato calchi velu:
ja chi de su coraggiu ses anghelu
in mesu bi at puru àtera cosa
ca trabagliende in dogni gratacelu
b'at finamenta zente paurosa.
Ammito sos pianos chi los fetes
ma de protetzione bi an sas retes.

61. Sozu (50'')

No bi nde cheret zente chi at paura
in sa costruzione gai fata
ca si los leat a dolore 'e mata
e-i sa resa mai no est segura.
Sos chi an coraggiu in cussa cobeltura
passizende si paren in piata.
S'òpera insoro poninde in risaltu
no pensan mancu a cantu sunu in altu.

62. Piredda (

.....
.....
....chi as coraggiu fin'a fundu
no as de sos ispìgulos paura.
No est su primu ne-i su segundu
chi nd'est caladu dae sa cobeltura
e-i sos chi nde ruen dae inie
sunu sos coraggiosos che a tie.

63. Sozu (50'')

Tocat chi calchi cosa nde raconte,
ponen a su bersagliu sa carena
ma trabaglian cimentu, pedra e rena,
pàrene subra sa punta 'e su monte.
Tue non pigas a-i cussu ponte,
faghes ebbia una domo terrena
comente sos antigos fatu nd'ana
chi che pigat a sàltiu una rana.

64. Piredda (48'')

Arrejonende ses pagu seguru,
o Peppe, debes esser pius saggiu
ca be-i cheret su timore puru
sos trabaglios chi ponen in viaggiu:
cussos los faghet su fraigamuru
no b'intrat ne paura e ne coraggiu
ca a totu est sa pagnota bisonzosa
ma su coraggiu est un'àtera cosa.

65. Sozu (57'')

Fininde como giramos s'antenna
ca amos de passare a àteru logu.
Mùtzio su chi at fatu no est jogu,
decretat isse etotu sa cundenna :
mustrat coraggiu de fronte a Porsenna,
s'at arrustidu sa manu in su fogu.
Da chi s'at cotu una e duas manos
connotu an su coraggiu 'e sos romanos.

66. Piredda (53'')

S'est chi su tema che 'ogamos a fora
leamos duos fatende s'amore.
Su giòvanu at in coro un'aurora
e issu este su veru amadore
ma su giòvanu mesu aduladore
godire si la cheret prima 'e s'ora.
Sa paura l'avertit e l'isfidat
e timende s'ingannu non si fidat.

TEMA II: **ONORE - DINARI**

1. Sozu (1'23'')

Nos ponimos de nou in bonumore
sentza mirare su tempus in cara
ca non nos est faghinde note rara
adata 'e s'istajone 'e su fiore.

Po cumpletare istanote sa gara
como in tema mi an dadu s'onore:
a lu difender mi at a dare istragu
poite como si nd'agatat pagu.

2. Piredda (58'')

Com'apo abandonadu su timore
su primu tema chi amos cantadu
e-i como s'illustre comitadu
m'at fatu 'e su segundu possessore:
a Peppe Sozu l'an dadu s'onore,
a mie su 'inari mi est tocadu.

Gasie miliardios ap'a pala
in recumpensa de sa note mala.

3. Sozu (1'09'')

Tue ja podes curre a galopu
chi non t'allisciat ne lana e ne tudda.
Ma sa lamenta mia est torra cudda
no isco s'apo a raggiungher s'iscopu
ca de 'inari si nde agatat tropu
invece de onore guasi nudda.

Però mancu po cussu mi lamento:
de su pagu chi tenzo mi acuntento.

4. Piredda (59'')

Deo arrejono ùmile che seda
e non do a niunu su contràriu.
Beru chi 'inari si nde agatat meda,
m'aggradat su sistema monetàriu:
nelzas dinari o li nelzas moneda
est in sa vida tropu netzessàriu.
E chie su 'inari lu manizat
pius nde tenet pius nde disizat.

5. Sozu (1'07'')

Tue t'esprimes de custa manera
ca tenes milliardu o millione.
Deo non so viaggende in-d-un'era
de che pigare 'eretu a su pinnone
però s'onore est in sa bandiera,
sa chi possedit una nazione,
chi cussa ne tentennat ne ribbaltat,
solu dae s'onore est chi si esaltat.

6. Piredda (57'')

Chie est chi ti la negat sa rejone
ca m'asa fatu un'otava fiera
.....cheret po dogni pessone
ca sa difesa as de ogni manera
ma da chi rica est una nazione,
chi respetada est una bandiera
ma s'est sa nazione sotomissa
est pagu onorada finas issa.

7. Sozu (1'03'')

Antoni, mezus s'onore nd'esalta
chi est sa palte santa e beneita.
Si in gherra si jogat una calta
si una nazione est tando aflita
podet bessire da un'isconfita
ma nd'essit da inie a fronte alta.
Non podet aer de sorte sa pàchia
ma est sa bandiera sentza màchia.

8. Piredda (57'')

Póvera paghe e póveru un'Istadu
su compitu subbitu as a contràriu
e si no at su tantu netzessàriu
mi' ch'ènit sutamissu e obbrigadu:
a da chi ses in totu ispiantadu
ti ch'andas a sa gherra volontàriu.
Pro ti leare pane a ti nutrire
andas a gherra a ti fagher bochire.

9. Sozu (56'')

No est nudda si so ispiantadu,
poto esser s'eroe de milli lotas.
E sempre a mie in prima fila notas
cun onore, cun méritu e cun gradu.
Santu Frantziscu a su babbu at torradu
su 'inari, giancheta e-i sas botas
ma at s'onore cussu frantziscanu
de esser protetore italianu.

10. Piredda (41'')

Santu Frantziscu mi as fatu a ischire
nachi est s'onore a sa lughe serena.
A sa babbu at torradu su 'estire
cando ch'aiat sa domo piena
da poi est issu andadu a pedire
che unu domandone a janna anzena
E unu che tue pienu 'e onore
est birgonza a lu 'ider pedidore.

11. Sozu (57'')

Frantziscu, una figura santa e bona
est in mundu unu 'e sos campioni
apretzadu da totu sas persones
che figura perfeta de ogni zona:
no at acumuladu milliones
ne at tentu sas bancas de Sindona.
Prim'at trufadu in sas cascias anzenas
poi si passat s''olteddu in sas venas.

12. Piredda (50'')

Santu Frantziscu at onore bastante,
bantadilu comente unu maju.
Però non fidi unu beneistante,
de sàndalos si leat unu paju:
unu ch'andat a passos cun su saju
antzis ti naro unu saju pesante
una domanda fagher ti cheria:
da ue s'at leadu sa?

13. Sozu (57'')

De umiltade un'onorada iscola
 li at postu de glória un'aneddu.
 Su padre mannu e-i su padrigheddu
 de onorare in palcu ti consola:
 non m'as a narrer como a Fra Nigola
 prite riesumadu an in Casteddu.
 Ch'at a ponner a Gésturi in cadrea
 e-d-est onore a sa Saldigna intrea.

14. Piredda (46'')

Collega meu, no càmbies prou
 prite as de custu própiu tenore.
 Santu Frantziscu chi aiat onore
 dat su 'estire a su babbu sou
 poi leadu si nd'at unu nou
 e non fit de 'inari possessore.
 A custa zente fàgheli a ischire
 comente s'at leadu su 'estire.

15. Sozu (1'00)

Ma non t'aires, Antoni Piredda,
 pistende terra in custa superfice.
 Deo si tenzo onore so felice
 sia in àbbidu o sia in munnedda:
 de Nuoro t'ammenta s'iscritrice
 ch'est sa famosa Gràtzia 'e Ledda,
 sa chi at tentu su Nobel in consigna
 ch'at fatu onore a tota sa Sardigna.

16. Piredda (45'')

No nd'isco si bi poto ressessire
a ti cumbincher comente collega
prite non s'arregonat a sa tzega
.....menzus concepire.
Tue po ti leare unu 'estire
est bisonzu chi andes a butega
e pagas in moneda italiana
ca in contu a s'onore no nde dana.

17. Sozu (57'')

Pone mente e sa 'uca ti suggella,
non neghes sos chi ubbidin a Magistru
ca s'onore si passat a registru
.....a s'umana parentella.
Si arrivadu che ses a ministru
e t'incantas po una bustarella
nàrami ite glória as connotu
s'as fatu disonore a tie etotu?

18. Piredda (40'')

A su chi so cantende dae cura
e da su bonu sensu ti consiza.
Pensa a Esaù, bene ti abbiza,
chi li at capitadu un'avventura
chi po duos platos de lentiza
s'at példidu sa primagenitura.
E vivet ispiantadu e pedidore:
apo paura chi no b'est s'onore.

19. Sozu (59'')

As a crer ch'eo mudu in palcu abbarre
 da ch'arrivas a su terrinu ebreu.
 Chie at onore no at taca e neu,
 ne l'incantan istàtuas de carre:
 ammenta sa muzere 'e Putifarre
 s'est abbratzende a Giuseppe s'Ebreu.
 Ma non lassat s'onore in abbandonu,
 ne pecat ne traighet su padronu.

20. Piredda (36'')

Cand'a cantare ti nde ficas reu
 càlmati non ti 'essas dae se:
 in s'argumentu frimabbi su pê
 tra s'argumentu tou e-i su meu.
 Ma non t'ammentas Giuseppe s'Ebreu
 chi l'an fatu 'e s'Egitu vicerè.
 Beru 'e onore nde teniat meda
 ma no li mancaiat sa moneda.

21. Sozu (50'')

In s'Egitu non fetas un'iscavu
 prite ses disturbadu dae me.
 Giuseppe est sempre onoradu e bravu
 po cussu sa fortuna andat de se:
 ch'arrivat a s'Egitu de ischiavu
 e poi est arrivadu a viceré.
 Si leat de cumandu una cadrea
 e onorat s'intrea ratza ebrea.

22. Piredda (53'')

Si leas de su tema sos azuos.
das a chie lu tenet su meritu.
Amméntati sos caros frades suos
ca fin ispintos dae s'apetitu
si ponen in viaggiu totos duos
e poite sun andados a s'Egitu?
Unu e àteru fit che pedidore,
no sun andados a pedire onore.

23. Sozu (53'')

Ja lis podiat dare pane e peta,
est padronu de 'inari e cereale.
Ma poite sa fama l'at cumpleta
e Zuseppe diventat immortale
che chie partit dae sa gaveta
e arrivat da poi a generale.
De vitória rara dadu at prou,
ammenta chi est totu onore sou.

24. Piredda (36'')

E chie ti lu negat su meritu?
A boghe alta bantatinde igue.
Su 'inari lu tratan in totue,
iscuru a chie no at unu citu
ma su ch'at fatu Zuseppe in s'Egitu
nara poite no lu faghes tue.
Prite comente issu non cumbatis
e andas inoghe a cantare gratis?

25. Sozu (49'')

M'an a pagare fina in cambiales
 si est zente onorada e connota.
 Ma da s'onore in sa terra tota
 che tenimos omnes immortales:
 sete tzitades bi at ancora in lota
 ca cheren de Omero sos natales
 ca at sa fama de grande autore
 e totu dian cherrer cussu onore.

26. Piredda (49'')

Su bellu est sa cosa a seberare
 o Peppe, subra sas siendas mias.
 Proite andat sa zente a trabagliare
 in sos frantoios e in galerias?
 Proite in terra faghen ferrovias
 puite ch'etan sos cargos in mare?
 Mi' chi est totu bene universale
 da su 'inari e da su capitale.

27. Sozu (49'')

Si che cheres pigare in altas vetas
 ma mie non mi faghet meraviza
 ca si tenzo s'onore, ti nde abbiza,
 in domo mia bi at ànimas netas.
 Tue naras chi tenes una fiza:
 si che l'imbias a fagher marchetas.
 chi sos casotos a de note esplorat
 e-i sa domo tua disonorat?

28. Piredda (45'')

Ca t'interessat una fiza calda
pro si godere su gustu mundanu
osserva, Peppe, sa Costa Ismeralda
da chi l'at su 'inari postu manu
e ada poi de sas zente salda
cantos che nd'at in Torinu e Milanu
.....ausiliu
ti faghet cambiare domicìliu.

29. Sozu (46'')

Ogni dùbbiu 'e mente che cancella
ma una cosa ti fato a ischire:
podes esser in gradu 'e progredire
tue e tota s'intrea parentella
ma, Antoni, si ti cheres irrichire
mai ponzas s'onore in bancarella.
ca cando ricu meda ti an connotu
as balanzadu ma as példidu totu.

30. Piredda (36'')

Su disonore est semplice brutura
e no est cosa de 'ogare a pizu
ma ue b'at sa richesa madura
comente miliardos s'assimizu
s'apo idea 'e andare a passizu
abberis finas sa janna a sa vetura.
E tue chi s'onore l'as in manu
passizas cun su caddu frantziscanu.

31. Sozu (51'')

Fritu 'e ijerru cun caldu 'e istiu
subra sas palas mias apo acoltu.
Ma si s'onore non mi andat a toltu
mai dae su mundu do s'adiu:
si non m'ana connotu sende 'iu
m'an a conoscher nessi sende moltu.
E mi riverin e m'apretzan totu
peri sa tumba 'e su milite ignotu.

32. Piredda (40'')

Chie pensat a toltu e chie est macu
e deo non penso a-i cuss'arrejonu.
A l'ischis su inari est totu 'onu
chi tenes sempre pienu su sacu:
chie at dinari faghet de padronu
chie at onore faghet de teracu.
E lu cumandat in dogni trabagliu
comente unu cane a guintzagliu.

33. Sozu (1'01'')

Deo l'ammito inue 'inari abundat
chi unu gradu in altu ti collocat.
Ma si ti mancat s'onore ti blocat,
sa conca da su tuju ti che mundat:
ma non creo s'onore s'abba infundat
e non creo s'onore fogu tocat
ca non l'at mai un'unda intacadu
ne peruna fiamma lu at brujadu.

34. Piredda (42'')

A pones a un'ala su buldellu
e ti lu pones in àteru logu.
S'onore est bellu, no lu leo a giogu
però est su' inari pius bellu:
non ti lu tocat ne abba e ne fogu
ne su 'entu ti leat su capellu:
non ti brùjana custa e ne-i cudda
ca tantu de brujare no che at nudda.

35. Sozu (49'')

Antoni, mezus fàgheti a sa muda
ca dananti 'e s'onore tue isparis.
In cojada, in bajana e in viuda
unu disastru pius feu aparis:
ammenta, custa proa dadu at Giuda,
a Cristos bendet pro trinta 'inaris.
S'abbizat chi su 'inari est peste e lua
e s'at dadu sa molte de manu sua.

36. Piredda (40'')

Giuda s'at fatu unu còmpitu feu
ca nach'est traitore e-d'est trassistu.
Si est de birbantésimu provistu,
cheret su portafogliu totu intreu:
bendet pro su 'inari a Gesu Cristu
chi cheret narrer su fizu 'e Deu.
Si s'at béndidu a Cristos Nazarenu
ite at esser s'ómine terrenu?

37. Sozu (58'')

Prit'in mesu 'e sos bonos ti che pones
 da chi tue non ses su mezus pernu ?
 Cun miliardos e cun millones
 viaggiare non podes in eternu:
 ja l'asa 'idu sos Caltagirones
 ch'an imbrogliadu finas su governu.
 Com'an su disonore afaca a s'oro
 e-d-est bistada sa dilgrascia insoro.

38. Piredda (49'')

Com'asa nadu a peràulas francas
 su chi fatu an paritzos imbrogliones.
 E deo so che-i custas persones
 ma tenzo su 'inari in sas farrancas
sas mias sas atziones
 chi como triunfende sun sas bancas
 ca si ti manco deo unu mamentu
 mi', 'enit dogni banca in fallimentu.

39. Sozu (54'')

Da chi de su 'inari ti nde fidas
 nàrami, Antoni, comente la pones:
 de su calcio sos nostros campiones
 las ana sas famiglias abburridas:
 incantados po pagos millones
 ana trucadu totu sas partidas.
 E diat cherrer chi Paolo Rossi
 che la finerat a giogare in s'Ossi.

40. Piredda (56'')

Tenzo a Paolo Rossi regualdos
 ch'est unu jogadore paladinu.
 Finamenta sos jogadores saldos
 sa fama connoschimus dae vicinu:
 su tale Boniperti dae Torinu
 li at ofeltu chimbe milialdos

.....

41. Sozu (52'')

Antoni, eo sas cosas addereto
 mancari chi non sia jogadore.
 Po duos miliardos non mi ch'eto
 in-d-unu bagnu 'e pùdidu terrore:
 est bellu a balanzare s'iscudeto
 ma a lu 'alanzare cun onore.
 Tando che pigat sa fama in altura
 e podet fagher ótima figura.

42. Piredda (49'')

Deo puru che tue los respeto
a totu sos colores.
 Bi nde at mannos e bi nd'at minores
 però comente sunu los atzeto.
 Peppe, po 'alanzare s'iscudeto
 mi' chi bi cheren bonos jogadores:
 non bastan sas personas onoradas
 ca a giogare non giogan in debbadas.

43. Sozu (1'07'')

Mi parit ora 'e la fagher finida
e penso chi sa zente l'at cumpresa.
Sa palte interessante est sa richesa
chi ti l'at una vida garantida
ma ruet dae nou in debbilesa
si sentz'onore li restat sa vida
ca nde falat a basciu dae sa chima
e peldet totu su chi at fatu prima.

44. Piredda (47'')

Si ordinadu as: su tema tanca
deo m'arrimo e non fato protesta.
Bi cheret sa cusséntzia bianca,
bi cheret s'allegria e-i sa festa
e cando b'est s'onore a manu manca
bi cheret su 'inari a manu dresta.
Pro arrivare a sos disizos tuos
est menzus chi bi sian totos duos.

DUINA

1. Sozu (13'')

Como duas otavas in duina
cantare lis devimos a sa rea.

2. Piredda (10'')

Ja chi cussu t'est bénnidu a bidea
a s'ora la sighimos sa faina.

3. Sozu (8'')

Ma cust'ària frisca montagnina
nos acumpagnat tota note intrea.

4. Piredda (7'')

Non t'at a dare in manu sa vitória
ma a su mancu t'infriscat sa memória.

5. Sotgiu (16'')

Mancu male istanote no che at bentu
comente che nd'aiat s'àter'annu.

6. Piredda (9'')

Ma s'ischit bene in sa Cort''e Cunventu
chi su fritu b'at fatu sempre dannu.

7. Sozu (7'')

Forsi no amos dadu bene mannu
poninde in campu su nostru talentu.

8. Piredda (6'')

Chi su fritu de Fonni fit s'eroe
Piredda ja l'ischiat prima 'e oe.

9. Piredda (8'')

Po aer fatu una note 'e fritu
podimos narrer: como ch'est passada.

10. Sozu (8'')

Ma su passare goi in dogni abbitu
ja semus lènde una bella trampada.

11. Piredda (8'')

S'ària arrivat frisca e rafinada
chi 'atit de cantare s'apetitu.

12. Sozu (7'')

Su passa-passa est chi nos faghet dannos
prite passende si che sun sos annos.

13. Piredda (9'')

O caru Peppe Sozu, ista seguru
chi s'ùltima si devet afrontare.

14. Sozu (8'')

Ma como tempus fit de passizare
in maglieta, a luna o a iscuru.

15. Piredda (8'')

Mi dia fina deo lamentare
proite ja so fritu deo puru.

16. Sotgiu (7'')

Che tue lamentare eo mi potu
ca tenzo fritu finas in capoto.

17. Piredda (7'')

E duncas lamentela no nde fetes
ca sunu fritos finas sos poetes.

BATORINAS

1. Sozu (40'')

Como cantamos una batorina
s'est dogni frase a ispetu discussa:
ca non b'aiat tantu linna russa
ch'at paga braja e ch'at paga chiJina.
Como cantamos una batorina

2. Piredda (19'')

A la cantamos una batorina
comintzat e si finit in lestresa
e meno male in sa gara fonnesa
chi no nos est mancada sa benzina.
Ja chi cherides una batorina

3. Sozu (20'')

A la cantamos una batoreta
sa poesia salda est mesu molta
e-i sas garas bellas de una 'olta
bi lis at a batire Mastru Ispeta.
Como cantamos una batoreta

4. Piredda (16'')

Tando cantamos una batoreta
si no canto comente una 'ia
su ch'apo minimadu in poesia
penso chi aumentadu l'ap'in peta.
Ja chi cherides una batoreta

5. Sozu (20'')

A la cantamos una noitola
ma s'esseremus in difficultade
'istade tzertos chi a-i custa edade
torrare no podimos a iscola.
Como cantamos una noitola

6. Piredda (17'')

Tando cantamos una noitola
non cherzo cambiare su discussu
e si no lis as dadu cosa 'e lussu
comente ti capitat che l'imbola.
Ja chi cherides una noitola

7. Sozu (19'')

A la cantamos una paesana
a da chi mezus no amus in domo
su ch'amos de ofrire in palcu como
che deven ingullire a mala gana.
Como cantamos una paesana

8. Piredda (15'')

A la cantamos una paesana
zente fonnesa as a tenner passéntzia
ca istanote ch'as a sa preséntzia
su pius betzu 'e sa terra isolana.
Ja chi cherides una paesana

9. Sozu (23'')

A la cantamos una furistera
ti crê s tue 'e sos pius antzianos
ma Juanninu Fadda 'e Fordongianos
ancora est biu, Antoni, cunsidera.
Como cantamos una furistera

10. Piredda (13'')

A la cantamos una furistera
ma Piredda t'atopat a caminu:
no che ponzas in mesu a Juanninu,
como serradu at sa bulveriera.
Ja chi cherides una furistera

11. Sozu (22'')

A la cantamos una bruschistriglia
No mi la sigas cun cussu pibiu:
finas a cando Fadda restat biu
non as a esser su capu 'e famiglia.
Como cantamos una bruschistriglia

12. Piredda (15'')

Tando cantamos una bruschistriglia
da s'argumentu no chi 'esso a fora
però a Juanninu Fadda dae ora
che l'an bogadu da s'iscuadriglia.
Ja chi cherides una bruschistriglia

13. Sozu (21'')

A la cantamos una tarantella
sa morte no che l'at bogadu fora
e tue da chi chi iss est biu ancora
chi che lu cheres bogare est sa bella.
Como cantamos una tarantella

14. Piredda (15'')

A la cantamos una tarantella
Mi' chi no cherzo fàghere un'abbusu
ma Juanninu non cantat piusu
duncas da s'iscuadra lu cancella.
Ja chi cherides una tarantella

DOMUS DE JANAS
CARRELA MONTE BIANCO, 54
SU PLANU - SELARGIUS
www.domusdejanaseditore.com